



Inatsisartunut ilaasortaq, Jens Frederik Nielsen, Demokraatit
Inatsisartut Allattoqarfiat
inatsisartut@ina.alla.gl

Royal Arctic Linep akigititanik qaffaanera pillugu § 37 naapertorlugu apeqquteqaammut 2023-170-imut akissut

19-02-2024
Sags nr.: 2023-28765
ID. nr. 90655398

Asasara Jens Frederik Nielsen

Inatsisartut suleriaasianni § 37 naapertorlugu Royal Arctic Linemi assartuinermi akigititat qaffariaateqarnerat pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1: Januar 2024 aallannerfigalugu Royal Arctic Line kissaateqarsimanerattuut assartuinermit akigititanut naafferartumik qaffakkiartuaartarnissaat suna tunngavigalugu Naalakkersuisut akuerisimavaat?

Akissut: Soorlu Royal Arctic Line A/S-ip (RAL-ip) ukiumut nalunaarusiaanni kingullermi aamma takuneqarsinnaasutut, RAL-ip ukiumut isertittakkami qaavatigut 77 millioner koruuninik isertitaqarnissaminnik pisariaqartitsillutik nalunaaruteqarnerat Naalakkersuisut aalajangiinerinut tunuliaqutaavoq. Taassumap saniatigut Ittoqqortoormiit, Qaanaallu tikinneqartarnerunissaannik politikikkut kissaatigineqarpoq, tamannalu ukiumut qaavatigut 2,975 millioner koruuninik akeqassalluni. Tamanna assartuinermit akigititanik qaffaanermit ilaavoq. Taassumap saniatigut Bremerhaven-imut toqqaannartumik attaveqalertussaavoq, tamannalu avammut tunisisartunut iluaqutaassalluni.

Tassunga tunngatillugu RAL-ip paasissutissiissutigaa, nunatsinni sanaartornerit annertuut arlallit naammassingajalernerisa kingunerisaanik kaaviiartitat appariartornerat, isertitaqarnerunissamik pisariaqartitsinermit patsisaanerusoq.

Nassiunneqartartut ikiliartornerat kaaviiartitat ikiliartornerinik, assartuinermilu inissamik tamakkiisumik atuinnginnermik RAL-imut kinguneqarpoq. Containerit assartorneqartut qassiugaluarpataluunniit, umiarsuarnik ingerlatsinermit sulii aalajangersimasunik aningaasartuuteqarpoq. Assartuinermit inissamik tamakkiisumik atuinnginnerup kingunerisaanik, isertitaqarnerunissaq pisariaqartinneqarpoq. Assartuinermit akigititat qaffariaateqarnerat tamatumingna patsiseqarpoq.

RAL-ip ilanngullugu paasissutissiissutigaa aningaasartuutit, taamaalillunilu isertitassatut pisariaqartinneqartut annikillisinniarlugit suliniutit assigiinngitsut aallartinneqarsimasut. Ilanngullugu assartuinermit akigititat ataasiartumik annertuumik qaffariaateqarnissaat pinngitsoortikkumallugu, assartuinermit akigititat ukiunut arlalinnut siammarlugit ingerlatseqatigiiffiup qaffariaateqartippai.

Tamanna inuussutissarsiortunut, nalinginnaasumillu atuisunut sunniutissat annikillisinneqarnissaannik siunertaqarpoq.

Aalaakkaassusermik inuussutissarsiortut qangaaniilli ujartuinerinut naammassinnittumik, assartuinermi akigititanik siumut ilisimanninninnissamik tamanna qulakkeerinninneruvoq.

Apeqqu 2: Assartuinermit akigititat qaffariaateqarnissaat avammut niueruteqarlutik inuussutissarsiuteqartunut kingunissaat suusinnaaneri Naalackersuisut naatsorsuutigaat?

Akissut: Assartuinermi akigititanik qaffaaneq avammut tunisisartut, eqqussuisartullu ingerlatsinermi aningaasartuutaasa qaffannerinik toqqaannartumik kinguneqassaaq.

Aalisarnikkut nioqqtissiat nunatsinnit avammut niuerutigineqarnerpaasarput. Taamaattoq nunatsinnit aalisakkat avammut niuerutigineqartartut, nunarsuarmi niuerfinni neqeroorutigineqartartut ilamininnguaat. Taamaattumik assartuinermi akigititat qaffatsillugit ingerlatseqatigiiffiit avammut tunisinermi akigititanut sunniuteqarsinnaanngillat, aningaasartuutillu qaffaataannut annaasamut matussusiinnaanatik.

Apeqqu 3: Assartuinermit akigititat qaffariaateqarnissaat nunatsinni niuertarfiutilinnut kingunissaat suusinnaaneri Naalackersuisut naatsorsuutigaat?

Akit qaffariarnerunissaannik kinguneqarsinnaasumik, assartuinermi akigititat qaffannerat nioqqtissarpaaluit nalinginnaasumik akitsornissaannik kinguneqassangatinneqarpoq. Aningaasaqarnermit Siunnersuisoqatigiit kingullermik nalunaarusiaanni, 2024-mi akit 5 %-it sinnilaarlugit qaffariassasut naatsorsuutigineqarpoq, assartuinermilu akigititat qaffannerat tamatumunnga qaffatsitsisinnaalluni.

Oqaatigineqassaaq, assartuinermi akigititanik killiffinnut agguataarineq, akit qaffariarnerisa sunniutaanik ukiunut arlalinnut siammaaqataassammat.

Apeqqu 4: UKA 2022-mi Royal Arctic Line kisermaassilluni Kalaallit Nunaannut avammullu il. II. assartuussisarnerata atorunnaarsinneqassappat pitsaaqutit ajoqqutaasinnaasullu Naalackersuisut misissuissasut piumaffigineqarput. Misissuisimaneq kingusinnerpaamik UPA 2024-mi Inatsisartunut tunioraanneqassalluni. Matumani misissuineq sumut killippa?

Akissut: RAL-ip assartuinermi kisermaassinera pillugu nassuiaasiorneq tunuliaqutaralugu RAL misissuiffigineqarpoq. Massakkumut naatsorsuutigineqarpoq, nassuiaat piffissaq eqqorlugu tunniunneqassasoq.

Apequt 5: Nalackersuisut suliamut tunngasunik paasissutissanik allanik paasissutissiisinnaappat?

Akissut: Naamik.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Erik Jensen